

setzet/auch keins ander wissen oder verstand hierin tadlê/ oder verachten wöllen/ darmit ich mein meinung erhielt vnd approbieren möcht/sonder sag allen Scribentē grossen danck/das sie also gutwillig von jaren zu jaren ein solche lange zeit durch grosse vnd sonderliche geschicklicheit ein solchen vberflus vns mit getheilet haben/ darauff wir/wie auß einem Brunnen das Wasser geschöpfft wirt/vnsern verstand gezogen/gemehrt vnd gescherpffet/vnd solche ding zu schreiben dester geschickter vnd verstendiger worden. Also das wir auß anleitung vnd vertröstung solcher Authoꝝ vnd Scribenten desto Kecker vnd vertraueter diß vnser Werck in Schrifften zu stellen gewagt haben. Dann als ich von ihnen ein anfang meins fürhabens gehabt/vnd gewisse anleitung empfangen/hab ich dester beherzter vnderstanden sirt zufahren. Dann als zu Athen der Agatharchus von Eschylo vnderrichtet/ der aller erst die Tragedisch Scenam auff bracht/ vnd in Schrifften stellet/wurden darauff bewegt vnd verursacht/Democritus/vnd Anaxagoras das sie auch von solchen dingen weiter Schreiben/vnd in Schrifften stelten/die sie durch grossen fleis vnd scharpffsinigkeit erfunden herten/nemlichen wie gegen d scherpff des Gesichts/vnd schiessen der Stromen oder Radien des Gesichts/auff ein gewissen puncten gericht/die Linien/ also das gesehen ding fasseten/das von vngewissem ding/ gewisse figur vnd gestalt der Gebew in den gemehlen der Scena gesehen wurden/ vnd was auff eben Glattē flechen gemalet sich etlich abstele/etlich sich herfür truck vnd erhaben erscheine. Nach disem hat der Silenus von dē Symmetrijs der Dorischen Gebew geschriben/ wie auch vom Tempel Junonis zu Samo Dorischer manier Theodorus ein sonderlich Buch geschriben hat/vnd von dem Tempel der Diana zu Epheso der Cresiphon vnd Metagenes. Vom Tempel Minerue zu Priene Ionischer manier der Phileos / des gleichen vom Tempel der Minerue zu Athen im Schloß haben beide Ictinus vnd Carpion geschriben. Aber Theodorus vnd Phocæus haben das Tholum zu Delphis beschriben. Philo hat die ganz Symmetriam der Tempel vnd Kirchen Gebew beschriben/ des gleichen das Zeug oder Rüsthaus das in Porticu zu Pyraei gestanden. Hermogenes hat den Tempel Diane Ionischer manier zu Magesia erbawen in der form Pseudodipteros/vnd den Tempel Liberi Patris zu Teo/in der form Monopteros erbawen/beschriben. Wie auch weiter der Archelius von der Symmetria Corinthischer manier/ vnd zu Tralla den Tempel Aesculapij beschriben hat/ vber welchen Bawer selber oberster Bawmeister gewesen sein sol. Das Mausoleum haben Satyrus vnd Phyteus beschriben/ dardurch diße Scribenten

benten